

Folkpartiet: Ruottin liberaali puolue

Information & Fakta

Folkpartiet oon Ruottin liberaali puolue. Jokhaisen ihmisen loukkaamaton arvo oon meän ideologiin, liberalismiin, perusta. Tavote folkpartiin politiikale oon ette jokhaisella individilä pittää olla vapaus ja työkalut omitten unelmittin toheuttamiseksi. Met uskoma ihmisitten järkheen ja omhaantunthoon.

Meän Tulevaisuus

Tämän vuen vaalissa oon Ruottin tulevaisuus kysymyksessä. Ruotti tarttee kilpailuvoimaa ja uskoa tulevaisuutheen. Met käyttämä kolmea sanna politiikan esittelhyyn: Tieto - Työ - Turvalisuus. Siittä näkkee kunka met halvaama ette Ruottista tullee voittaja globaalissa kilpailussa.

Tieto

Met halvaama jo peruskouhluun lukea-kirjottaa-räknätä-garantiin, ette satsathan enämpi tietämiseen ja ette toistukset/betygit annethaan varemmin. Mobbaus, tappelut ja väkivalta koulussa häätty loppua. Sen takia met halvaama antaa opettajille enämpi valtaa ja ette koulussa annethaan lausunto oorninkista kans. Met halvaama ette tutkimukset ja korkeamat koulutukset oon parempaa laatua.

Työ

Tietoa lissäämällä ja tietoa paremin muuttamalla yritysideoiksi, työpaikkoja lissääntyy. Useamat häätvät haluta alkaa omia yrityksiä, sen takia yrityksen alottamista häätty helpottaa ja veroja laskea. Se pittää aina olla hyöylistä mennä bidraagista työhön, sen takia verot häätty laskea käyttämällä työvähennyistä joka auttaa niitä joila oon matalat tulot.

Turvalisuus

Privaatti yrityksissä tulevat työt jotka tekevät hyvinvoinista turvaliseman. Enämpi verorahoja taas antaa maholisuuven paremalle siukka- ja vanhuustenhoiole. Jonot siukkahoithoon häätty lyhentää ja hoitogarantiitä parantaa, sinun pittää itte saa valita tohturi ja siukkatupa. Huolenpito-garanti pittää koskea kaikkia meän yhtheiskunnan vanhuuksia, se turvaa ette saapi sen avun minkä tarttee. Se jolle ei löy paikkaa erityisistä vanhuusten asunoista, häätty saa rahhaa kätheen ette se saattaa ostaa net palvelut mitä tarttee. Turvalisuus rikoksia kohtaan häätty lissääntyy. Häätty olla enämpi poliisia ja kaikki rikokset häätty selvittää. Poliisi häätty saa käyttää tehokkaampia keinoja rikoksitten vastustamisessa.

Integrasjuuni

Moni ihminen Ruottissa oon työn,

yhtheenkuuluvaisuuden ja yhtheiskunnan ulkopuolela ko niilä oon erilainen eetninen tausta. Tämmönen ulkopuolisuus lissääntyy. Työlä, hyvillä kouluila, turvalisilla asumapaikoila ja sinnikkäällä taistelulla diskrimineerinkiä vasthaan met saatama rakentaa integreeratun Ruottin. Met liberaalit tulema taistelemhaan ulkopuolisuutta vasthaan työ- ja kehitysgarantiilä työkyksille, tietogarantiilä koulussa jossa ruottin kieli priuriteerathan, terävämällä taistelulla diskrimineerinkiä vasthaan ja kolminkertasella määrälä lähipoliisia aluheila jossa ulkopuolisuus valtaa. Ruottin kansalaiseksi pääsemisen ehto oon meän mielestä ette ossaa jonku verran ruottia.

Globaali Solidariteetti

Folkpartiet oon kansanvälistämisen puolesta. Met hyväksymmä globaliseerinkin. Met olema tehokhaan EU:n puolesta joka keskittyy rajojaylittävhiin kysymykshiin ja met halvaama lisätä vappaa kauppa ja avunantoa. Rauha luoha lissäämällä yhtheistyötä ja ymmärtämistä. Se oon rohki tärkeää ette Ruottin ulkopoliitikka oon aktiivi. Met emmä saa vain olla hiljaa ko vääryyksiä tehään. Avunantopolitiikassa häätty priuriteerata tukea demokratian ja ihmisoikeustyön puolesta.

Tasa-Arvo

Tasa-arvo häätty parantua. Miehen- ja vaimonpuolila on erilaiset ehöt tänä päivänä, erilaiset maholisuuet ja niitä kohehlaan erilälaila. Viimisitten kahentoista vuen aikana ero miehitten ja vaimonpuolitten palkoitten välilä oon ollu sama. Sitä ei saata hyväksyä.



Folkpartiet

www.folkpartiet.se

020-53 53 53